

春
草
堂
集

春草堂集卷二目錄

樂府

東門行

行路難

古釵歎

班婕妤

棄婦詞

賽神曲

寒夜曲

鳥夜啼

車遙遙

雞鳴曲

黃爵行

少年行

豔歌行

巫山高

白頭吟

妾命薄

邯鄲才人嫁爲厮養卒婦

自君之出矣

將進酒

關山月

白苧辭

陌上桑

箜篌引

隴頭水

採蓮曲

虎偃行

子夜春歌

夏歌

秋歌

冬歌

白雲謠

寒月歌

升天行

星河引擬賈島

夢遊天姥吟擬李白

五言古詩

耕織詞

聞雁

雜詩

大明湖

跑突泉

哭張鏐

得塞外書

古詩畲今人

打麥歌

與諸弟論詩八首

秋晚

讀史偶成

由無爲州之桐城道中作

由桐城之安慶道中作

客松江普照寺

同欽吉堂遊雪峯寺

懷陳穆堂

漢鎮購得婕妤明妃二圖各繫古詩一首

舟次平樂俞荅琴太守以朱鋌白粲豚炭果蠟
等物見惠並繫五言古詩一首依韻奉酬

與滕澥峯語舊

七言古詩

送友人從軍

題阮梅叔明經珠湖漁隱圖

苗孝孫

繆研農司馬隸書歌

哭仇柏巖茂才

餞春歌

紀夢

代相馬篇

小題襟館聽張伯治洞簫武實父鳴琴

爲友人題唐寅踏雪尋梅圖卷子

神鐙曲

曙原贈墨成篋書此覆之

戊寅秋七月遊相墩作

虞醫士五十壽徵詩同社分題得摩詰畫

陳孺人輓歌

李長吉詠月

無題

解案歌

指書歌爲張鴻遠作

偶成

送史牧田

許季青索題鼓桂招隱圖

憶月

心朗和上出其師慶尊上人行腳圖屬題

成簡能屬題桃花流水鱖魚肥小照

示紫貧僕

王西成出行看子屬題

楊述臣茂才屬題倡酬詩冊卽用原韻

題張傳山紀夢圖

招魂曲

題盧春航江洲春泛圖

畫松歌爲張夢餘作

篆書歌爲程蘅衫作

登太白樓

題劉笠生茂才紀夢圖

題吳晉堃上舍梅花書屋圖

晉堃復出楊龍友書畫冊屬題

江行紀事

解上遊仙詩

留別盛子履學博

四月十五日渡黃河作

抵寶慶晤譚鐵簫太守卽夕以英雄兒女圖屬
題

李澥飄觀察屬題釣鼇圖卷子

秋日見牡丹一枝

揚州鶴

望羅浮吟一篇示相姬

鄰船有以篷背雨聲詞見視使雛僕歌之其聲

清越遂敷其體成四首

苦雨

太白樓

李玉郎歌

金約指歌爲瑞喜兒作

李生玉郎歌

春草堂集卷之二

甘泉 謝莖 佩禾

樂府

東門行

出東門塚纍纍驅車白楊道蕭蕭寒風吹行人爲語道
旁碑昨日未死猶作威

行路難

行路難涕沾翰百尺危橋一尺寬上有懸崖蔽日之高
山下有弱水沈沙之深潭惡風左右相盤旋一生一死

須臾間旁豈無人人不援行路難涕洟此身一出山
之顛旁人見之疑登天羅列跪拜呼金仙行路之難難
於此何不終身老鄉里

古釵歎

古釵復古釵何代土中埋上有精靈血年深成紫苔儀
式樸且素光明被塵埃世人尚雕飾憂思縈中懷

班婕妤

密雲翳闌闌微雨膩芳簾相思如轉環綿綿不可斷瞻
彼芙蓉葉誰肯題紅怨拊枕懷舊歡空牀覆團扇中有

同心花花花壓金線何爲鴛與鴦無時不相見

棄婦詞

三年妾不育不育妾當逐上堂辭舅姑出門登回車回
車涉溝水水畔芙蓉死憶妾初嫁時柳挂黃金絲春風
誓蘭室永懷託琴瑟鑪灰嗟未寒靡蕪已滿山靡蕪葉
復葉妾心結復結寄語新蛾眉早叶熊與羆

賽神曲

月光溥日光吐椒漿桂醑盈樽俎嫗鳴鉦翁擊鼓山花
插頭女巫舞翦紙書朱焚告天金刀割臂血色鮮盤抓

果餌撒如雨，饑鳥得食飛。樹顛巫指視，翁神使然吾當
爲翁求豐年。

寒夜曲

蝦蟆柝緊銀燭殘，銅壺漏滴寒水寒。擁書隱几未入夢，
兩鼠爭食盤盂翻。大鼠得食匿深穴，小鼠嚙我牛車鐵。
燭花一笑梨雲飛，四境砮聲響明月。

烏夜啼

宵雲溼夢露華紫，城烏啞啞啼不已。啼醒紅闥秋月孤，
蘭膏欲死光模糊。傍皇起視明河稀，下階尋烏烏莫啼。

藕花葉底鴛鴦櫺

車遙遙

天蒼蒼地茫茫車遙遙兮游何方
高堂明鏡凝新霜白
晝然燭無輝光無輝光凋朱顏
桐葉秋啼絡緯寒車兮
車兮何時還

雞鳴曲

東方欲曙天未明
膈膈膊膊雞亂鳴
披衣上馬出門去
霜橋雜遝行人聲
行人爲語官家子
食必珍羞衣必綺
千金一宿邯鄲倡
此時高樓眠未起

黃爵行

少年抱弓出門去見鷹攫爵少年怒拓弓彈鷹拾爵歸
裹以紅綃哺以糜爵不死少年喜爵飛躍少年樂爵得
春風解報恩銜來印綬縣當門

少年行

十五卽封侯金鞍壓紫駟椒房小妹新承寵簪花宣室
登螭頭鬪雞曉入市持刀畫雪冤揮鞭直出榆關外誓
斬樓蘭報國恩

豔歌行

黃金爲門玉爲堂丹桂作棟杏作梁臨風含笑羅裾香
玉盃輕浮琥珀光駿馬一聲嘶夕陽歸房重整額邊黃

巫山高

楚妃至今不曾死行雲行雨巫山裏巫山高接青冥天
雲雨和淚墮湘水湘水深妾斷魂相思迢迢一千里孤
負君王夢裏恩

白頭吟

朝對鏡容嫩好暮對鏡容枯槁朝朝暮暮鏡常明可憎
妾容容易老妾容老去妾心愁茂陵有女花潛羞纖纖

十指能筌篲妾心愁情非妬衣嫩新人棄故嫩新棄故
無時無白頭吟成和淚書郎回心妾所願糟糠畢竟安
貧賤

妾命薄

妾命薄薄似紗紗尚爲衣裳伴郎天之涯天涯不歸郎
不知妾顏不復如花枝

邯鄲才人嫁爲厮養卒婦

妾本邯鄲女家住邯鄲里七歲能筌篲八歲精鍼黹九
歲解詩書十歲通經史十三選入爲才人牡丹紅透漢

宮春三千蛾眉盡低首多謝君王寵一身夜夜笙歌不
虛度珠簾翠幌教春住博山鑪焚沈速煙竹枝鹽灑羊
車路可憐歡笑無久常一朝兵燹來咸陽秦人如虎趙
人羊妾身不復爲宮妝

自君之出矣

自君之出矣紅玉當窗困思君如落花隨風判茵溷

將進酒

玳瑁杯浮琥珀釀銀絲膾鮮山櫻紅佳人笑舞迴春風
雲霓擁月來天中鐙光照水白晝同會須良宵讌未終

拔劍起舞歌凌空昨日少年今衰翁徒使文章羅心胸
君不見陳遵愛飲稱豪雄

關山月

皎皎一片中天月照向邊城光逾潔荒煙四野草漫漫
笳聲不斷吹嗚咽紅閨空擬何時還夢裏愁多萬仞山
臥向沙場拚一醉更誰月夜唱刀環

白苧辭

縠紋如水揚清波凝霜積雪欺綺羅裁成長袖舞婆娑
明眸皓齒發豔歌銀箏檀板奏雲和鐙光照讌未顏酡

人生苦樂不同何江南女兒愁思多夜深獨坐弄寒梭

陌上桑

陌上桑歌嗚嗚妾非秦羅敷良人官琴大司徒從征曾
寄雙明珠歌嗚嗚情欲絕狐鼠跳梁鬼跳月磻聲搗碎
玉關秋夢魂冷怯天山雪妾有嫁時裳不採城南桑聞
道使君非管時不問桑枝問柳枝

箜篌引

煙光上接秋濛濛繁霜下掃芙蓉空兩鮫角鬪一鮫死
長河爲之波濤紅何物老嫗能死夫鮫宮一泣千珍珠

我欲向天索紙筆寫爲河伯夫人圖

隴頭水

隴頭之水飛千尺愁絕隴西萬里客浪花五月噴衣寒
回首家鄉渺雲端山空四顧人煙少春風不到無青草
潺湲直下遶北邙北邙流出舊刀鎗歎息少年游俠輩
徒使關中空斷腸

採蓮曲

風暖江南六月天蓮花塘畔葉田田蓮心似妾生來苦
蓮葉如郎到處圓

虎偃行

猛虎雖猛不食人
猛虎食人憑偃魂
我聞有客善弓矢
入山射虎偃先奔
腥風捲草秋狼籍
鬪骨孔塞土花碧
又聞有客山行孤
猛虎不知偃先驅
猛虎嚙骨偃褫裙
孤魂上訴天爲吁
天怒震虎虎立死
偃復入山導虎子

子夜春歌

相思子熟飄紅雨
豆寇園中春半吐
鸚鵡教慣催梳頭
鏡裏佯瞋阿母愁
琵琶故使絃絃澀
不奏霓裳歌偃仄
良人自是二千石
陌頭楊柳青何益

夏歌

醋醋風柔團蛺蝶拍拍波陰浴
鷓鴣菖蒲花開人不知
十枝五枝隨風吹冰凌如山後
堂側卻異深宮閉門日
窈窕流螢飛得入翅軟蠕蠕坐
牀溼

秋歌

羅裳夜怯雲容薄
燈光每共星光落
團扇常存隔歲恩
吹來襲襲風猶溫
盤中清露那成水
豈不懷思託箕尾
金蟾嚙破陽烏髓
紅折一枝芙蓉蕊

冬歌

洞房紅燭停深夜衣裳片片薰蘭麝
豪竹哀絲夢不成
釵環交錯渾無聲簷龍水盡千支換
屋上啼烏咽冰霰
紗窗白發情初倦珍廚又進將眠讌

白雲謠

白雲摧山山不動阿香使女腰肢重
篋鑰雜冰凌聲
五十鷗絃發新坼昨夜老鮫抱雲泣
片片精神瀉寒碧
相府公子龐眉人槽頭日日江南春
大袖飄然任來去
白雲入山不知處

寒月歌

元正堂卷之二
正風四起天無河龍女吹笙復擊鼉妖墓匿跡狡兔死
千年老樹空婆娑公子傷心雙淚血一曲關山腸斷絕
倚遍刀環草不青把酒臨風弔寒月

升天行

金墓膏玉兔臙萬古竟能長不死東澥風颺阿母沙燭
龍口吐紅珠子一墮泥犁千丈深竹竿鮎魚何紛紛君
不見雲中君

星河引擬賈島

月壓萬籟死冷滴星河水一滴復一滴滴出雙瓊蕊我

折一枝歸深宵開夢裏一枝留待誰流光去如駛

夢遊天姥吟擬李白

魂飄飄兮游太行太行山色含青蒼攀援直上捫參商
下視宇宙何茫茫既飲我酒復歌我章巉巖怪石鬱鬱
修篁惡風忽來腥莫可當毒蟲猛獸殺人尋常安得倚
長劍入穴清豺狼然後臥明月一覺穩滄桑

五言古詩

耕織詞

納稼爲君梁纜絲爲君裳可以禦君冷可以充君腸不

聞機上軸終宵聲斷續不見田間人
僵僂拾遺穀

聞雁

迢迢千里雁日夕相徘徊一朝失其羣
終夜鳴哀哀羽族尚憺類人生胡忌猜
最難是兄弟它生能再來

雜詩

鴻雁東南飛嗶嗶相徘徊高樓妾獨守
浮雲天四垂藁碓西入秦瓜期竟未歸
芳洲采蘭葉密線紉裳衣明月流素豔
落木飄涼颶寤寐忽攜手攜手各依依

游魚戲蓮葉薰風襲蘭芳佳人沙天末
關山道阻長鯉

魚絕層波鸞鏡無輝光高堂然晝燭再拜心煩傷
女蘿拊木生匪木不自立其計亦良然所苦不自擇拊
松可千年拊棘能幾日樵蘇惡棘刺焚燒無玉石嗟哉
巖穴士出處慎緩急

矯矯雞羣鶴或疑翮不奮一奮卽冲霄上與鸞鳳並胡
爲守區區終爲稻粱困鶴豈不知時微風那可振

朝聞桃源好莫問桃源津相逢打魚人語我桃源春卽
向桃源來茫茫多白雲竹露滴青脆松風發幽深所以
郭景純愛作游仙吟

大明湖

新水滿陂澤野草滋春榮
森森蕩微波中有鳧鷖聲
南山雲氣佳高歌瀉瓊英
漁樵翕遙響伊啞撐月明

酌突泉

飛霰灑層波夕陽印深碧
撫松發遐想谷風何習習
條爾一聲鐘萬片繁英集

哭張鏐

嗚乎張老薑諱鏐字子貞
余生感知已作此哀輓章
先生性恬澹與世無較量
眾水匯滄澗萬木拱博桑
余管

敬其廬先生之山陽卽放山陽船復聞歸故鄉故鄉在
黃澥舊有先人塋三年一省墓不廢人子情會合苟非
時一面緣猶慳前年三月閒杯酒始共傾相逢若舊識
忘年復忘形贈我求當集索我春草堂妥貼互歎賞瑕
疵相與爭掩卷論詩派作者近如林時世尚綺靡吾輩
當清真觀我扇頭詩始識范巨卿謂雨問名三太息此
豈久沈淪自詡五言詩堅固等長城此人係秦系偏師
氣縱橫從斯說項心到處逢人揚張范既定交招余駕
野航歡言酌村酒攜手登蜀岡瞻彼南徐山高歌發慨

曠今年四月閒先生招吟朋少長三十人送春集僧房
當階折紅藥登盤薦朱櫻藏鉤更射覆簪花羅酒漿驪
必探其珠魚必截其肪留髭復然燭呼孫來我旁摩頂
善應對哦詩聲頗清似此瑚連器後必登廟廊近聞
下詔書天子重賢良指日食天粟邑粲闡幽光
先生云不然此願非所望骨相似孟郊不如安賤貧終
身守蓬茅轉與造物親倘邀非分祿翻恐罹其殃折柳
贈歸騎把袂猶殷殷相約采蓮時同奏薰風琴詎料余
歸來百冗晝不停時雨每延佇災疫況流行盛暑猶着

綿月無三日，姓親戚半爲鬼。虐厲肆披猖，擬待草木落。
還來就壺觴，晨興頗恍惚。夜夢胡不祥，夢君色沮喪。忽
覺舉我裳，我裳旣云裂。未卜否與臧，范子倏然至。言君
作修文，聽言瞪兩目。徘徊復徬皇，審知暴疾殂。愛孫隨
遭殤，仰天大涕泣。胡爲喪老成，此老善勸懲。風詩歌昇
平方干，不偶世生前。無令名我聞，擅一技足可揚。清芬
先生兼衆藝，衆藝況超羣。詩詞尚新舊，丹青追關荆。篆
籀古鐘鼎，鐵筆尤絕倫。雖然重傷悼，誰非不死人。身死
名不磨，合與前賢并。蓬蒿困仲蔚，猖狂隱步兵。杜甫拾

椽時避兵走且僵李白被讒謗千里流夜郎先生今較
之致身無乃康生當 聖人世五十非夭亡而我感知
已未免摧中腸以後永決絕終爲參與商拉雜成此詞
長跼告靈幃先生如有知含笑斯來饗

得塞外書

彈我枯桐琴歌君遊子吟仗劍出榆關道路歷嶮嶇春
草蕭大漠塞寒天地心黃河無回波畫角多哀音斷碑
沒榛莽飲馬城窟深狐狸穴古墓鴟鴞鳴長林嗟彼風
土異卧病荒山岑豈無蘗與木何如薑與苓歌竟不復

彈涕下沾衣襟

古詩畲今人

晨興坐南軒清風開襟裾客從山中來報我山中書山
中多蕙蘭荆棘礙其途物各有生性而我不忍鋤寄語
山中人此心久澹如

打麥歌

朝看野雉飛暮聞連耒響鄰村打麥人辛苦忘月上月
落星復稀猶呼兒暮啼一日不汝飽終年免汝饑

與諸弟論詩八首

太古不好名或恐知姓氏三代已下人紀傳去聲傳其事

今人非古人今藝非古藝所以孟東野偕詩鳴於世

今人每論詩愈窮而愈工殊不知窮字不與貧窮同窮乃窮其源經史須博通吾儕豈不知沿襲已成風

古書不多讀楊腹難爲情讀書如不讀爲學方有成譬如善彈琴絃外發新聲彈琴與讀書貴熟而後生

吾愛杜少陵一語最沈着古人當自愛今人不可薄離騷三百篇嫩人爲寄託何其義山詩任意訾文弱

杜固不可疎亦莫泥於杜去聲泥則失其真疎則無法度

村莊好女兒自有怡人處何必學西施翻爲脂粉污去聲
長吉豈鬼語太白豈仙才不過篇什中仙鬼僭言懷古
人有深意各立一門楣區區抱非薄強派何爲哉

三月多嬌花春風發桃李金菊與芙蓉豔豔秋光裏花
開故有時此亦自然理須知宋元詩乃風氣所使
大約作文章下筆母草草貴直而不麤忌纖而不巧隨
手拈得來眼前景便好道家丹不成畢竟火候少

秋晚

夕陽橫遠岑煙光澹翠木孤鐘發清音遠村罷樵收戀

戀景光幽思結數椽屋感彼巖下士終身遠榮辱

讀史偶成

蘇秦重游俠輿服都且嫩朝發咸陽城暮宿邯鄲市公
侯卿大夫顏色望風靡時命不我與金盡貂裘做羞容
向戚里垂眉對妻子高歌行路難丈夫亦蹈此

范睢位既貴僞作窮途哭前歌烏畢逋繼歌車脫輻綈
袍慨相贈貧賤交猶篤嗟哉古人心矢直弓尚曲飄飄
三春花芳蘭自空谷

于房柔且謀不應匹夫勇何事博浪錐大索身何窘窳

駢入城市人嗤馬背腫畢竟帝王師卻異世潛憎

吾家太傅公性情自疎放受此榮與祿慰彼蒼生望中
年感絲竹南北天所向圍棋報捷時折屐後人謗嵇康
阮籍流清言何所尚

由無爲州之桐城道中作

甫出城南門見山不見水三里一息肩十里一停軌仲
冬十一月水涸澗見底輿夫脚不韋麤砂沒脛趾橋梁
木倒縣亂石橫齒齒我時下輿行貪看山色嫩悞觸石
峯稜一痛入骨髓

一日復一日始達廬江境夕陽猶在山輿從勸不進云
此村店壁官示有禁令當年孔爵飛此日豺狼競白晝
能噉人我等况疲困吾從平聲從者言篝燈坐孤另晚飯
團麤砂支牀倚石櫂所欣信天翁邈世久無悶

看山如看畫幅幅領共要荆關董巨流筆墨各盡妙青
黃赤白色濃澹奇險貌或者宜遠觀或者宜登眺生松
竟無泥出雲似有竅根或成村莊頂或建祠廟叮嚀戒
僮僕慎毋瞋輿皂當此日夕佳乘輿探奇與明日龍眠
遊此境不可造

由桐城之安慶道中作

蓮葉來田田雨雪猶未歸驅車復南陟陽鳥光熹微荒
山六七里土赤居民稀山畚多火耕向夕煙霏霏

歲暮猶長征欲速破昏曉霜凝鬚成冰塵污髮如槁豈
不懷鄉間江河已遠道蕭蕭楓樹林斜陽倦飛鳥

客松江普照寺

寓居普照寺云是機雲宅卽今爲僧房荒碑臥階側緬
彼二賢心何事洛陽陌橫雲山色佳谷水嫩陂澤文賦
有令名兵機那可測白鶴雲中唳黃犬土中殖千載遠

遊人中懷自悽惻

同欽吉堂善遊雲峯寺

山寺貴幽僻文章忌瑣屑中殿無正樑盤旋若攢骨畫
壁雙龍翔云是趙松雪孟備松雪兄捨身去爪髮寂寞
顏垣碑凜冽寒窗月終古無垢心對此生禪悅

懷陳穆堂

去年客饒江頻頻夢見之今年客雲間那復無相思相
思一何深音書一何稀之子貴適意哺醢其醢去日
不再來老大傷別離願爲雲與龍終古無分期

之子丹山鳥毛羽成文章所以女與牛日夕遙相望人
生苦朝露年壽不能長謂姚卿門嗟子亦垂暮二毛被雪霜
撫膺發浩歎涕下沾衣裳

春風二三月賤子復南征匪恣遐荒遊其奈饑寒并中
道不我棄慷慨衷懷傾矯矯山上松飄飄水上萍鯉魚
隨波來尺素無限情上有蘇李詩下有金石盟

漢鎮購得婕妤明妃二圖各繫古詩一首

婕妤解人耳未免自矜愛不然君王心安能置度外人
生重歡笑容光正少女况復能文章素稱六宮最恩愛

忽陌路富貴竟顛沛團扇生秋風夜夜長門淚費却買
賦金君王復歡會千秋自恃人棄置曷足怪

明妃何許人千秋名不滅當時無畫師不過嬪妃列嬪
妃三千人豈盡容顏劣琵琶慰寂寥供帳隨時設假使
閉深宮隻影坐明月光陰去如水霜雪生華髮豈如出
關後清詞飛玉屑因憐戰死卒名姓無人說

舟次平樂俞茗琴太守

恒澤

以朱銑白粲豚炭

果蠟等物見惠並繫五言古詩一首依韻奉酬
性癖愛佳句知公非一載留連好山水不獨至今乃今

日始識公鬢髮嗟已改陶謝碑版多李杜光燄在行行
紀遊踪珠江與桂澥江澥有遺珠我志在搜采慷慨杯
酒間心胸起磊塊清風今夕佳明月猶睽睽照我離江
榕吹我蕭江菑清言達層霄或可銘鐘鼎所以起舞心
聞雞未敢怠裹糧爲糗糒多雉爲脯醢平生幾兩屐屢
躓而不悔多公能愛士檢點到烹宰散髮冰霜露披囊
得珠琲壯我湖澥志若箭透重鎧錫以鐙燭光卷帙生
文采況公葛相才勝不已十倍琴樽洽古歡嘉徵應有
待

與滕解峯話舊

君是故鄉人爲語故鄉事故鄉十年來言之合隕涕大
吏變新法萬井無生計水患旣頻仍天災亦疊至十月
桃李華三伏冰雪厲斗米錢十千物價各騰貴可憐厦
萬間瓦礫堆平地可憐錦千箱襤褸身難被昨日五陵
豪餓死填溝澮昨日金屋嬌倚門學嬉戲猶有不忍言
約略言一二我才居下中故鄉那可恃五十未服官况
多妻子累行行將何之索米長安市今夕復何夕執手
黃河涘之子詹尹流抱才隱卜肆請君揲著龜爲決休

與晦胡爲笑不言祇問梅開未

七言古詩

送友人從軍

晉君烹龍炮鳳之酒漿奉君組絲織素之衣裳君行萬里復萬里相思此後徒相望我聞交河以北險且艱雪花六月飛陰山黃砂黑砂刺人骨鬪饑號風白晝寒崎嶇怪誕苦如此不爲君悲爲君喜男兒得向沙場死亦有微勛報天子

題阮梅叔明經亭

珠湖漁隱圖

蒼煙浩浩湖波綠一葉扁舟一竿竹釣鼈公子神仙人
戲向蘆花深處宿珠湖之珠夜夜浮華老以後無人收
滿天明月數聲篴我本煙波舊相識知君返櫂卽蓬萊
凌雲暫斂垂天翼

苗孝孫

朔風生筍井躍鯉河冰寒迓三尺水一點真誠孝格天
芳名那不留青史吾鄉苗姓寒且微賁皇一線湖之濱
我家亦住棠湖側生小相逢卽相識苗郎名秀善丹青
彩筆團花飛紺碧乙丑秋母染疾醫有方藥無力焚香

告天向天泣割股奉親親疾除此孝世或論其愚已卯
秋母復病醫有方藥不應苗郎有子年十三幼隨大母
眠與餐體父之心繼父志金刀入吳衣裳殷嗚呼孝雖
愚情可憫十三童子發深省君不見眼前多少富貴者
纔解迴廊騎竹馬

繆研農司馬

傳

隸書歌

雙鉤異飛白隸書非八分所以工部贈李潮八分小篆
歌云云隸書亦自史籀始漢興諸人變斯體唐宋因之
別瘦肥窠臼何曾淨渣滓 聖代紛紛尚豪放不襲前

賢舊依傍谷口鄭蓋與汀洲伊秉綬乾嘉以來稱哲匠

研農司馬揮霜豪論書竟在諸人上筆貴折鋒墨飛舞
參新法古開門尸怒貌渴飲雲藏虹龍跳天門闕臥虎
塋也閉戶學書三十載金丹凡骨空嗟吁每觀司馬大
幅及小品煙塗雲抹英華咀始信鳩江之水清且腴鍾
靈毓秀多名儒司馬起家宦家子吏隱間曹破千紙賈
讓三上治河書劉宴初爲漕運使前年洪湖漲下游天
吳踏浪鮫宮愁災黎號泣夜復夜往往樹杪撐孤舟此
時司馬眠不得泥淤不顧征袍溼願得錢王怒朝暮向

潮射入聲 願得周處劍直入蛟龍窟蛟龍避德潛深淵
張鑑幕府開賓筵紀功著績寓筆墨衙齋四壁縣緘縣
司馬隸法較前異如椽每帶迴波勢狂瀾收作蠶食聲
筆鋒永向中流峙我有鶯溪舊所藏乞寫宣防數行字
它年擬作去思碑澤國竈鼉見應避

哭仇柏巖茂才

嗚乎噫嘻柏巖之死死實堪悲朝爲生日算卽死期我
初聞之心猶疑於是登其牀撫其尸觀其顏色宛如生
時與之語而不會問其事而不知嗚乎噫嘻黃口孤兒

白髮寡妻搜蓋篋無餘貲何以為棺何以為衣惶惶四
顧舉室淒淒悲風吹雁來眾鷗相因依或刻南山之瘦
木或翦東澗之殘絲草草具殮薄成其儀人心匪石對
此能不涕泗而交亟嗚乎噫嘻追思柏巖喜作賦而裁
詩我曾數四止其所為夫詩小技不合時宜縱仙如李
白猶有采石之危聖如杜甫難免飯顆之譏而況我輩
德薄才微間有一句兩句佳徒為輕薄兒所嗤乃不我
信終日啜血盡心痛一至于斯嗚乎噫嘻柏巖之死
死實堪悲

餞春歌

三月欲盡楊花飛
暝風醉煞紅薔薇
我來餞春湖之滄
臨風高擎白玉杯
勸春盡飲杯中之
茶蘼更有一言向
春道九十繁華爲
誰好前年餞春春
不留匆匆落日下
簾鉤今年餞春春
又老落紅滿徑迷
芳草今年風景似
前年何我容顏獨
枯槁杜宇一聲愁
思多愁多翻作餞
春歌

紀夢

深宵寄宿支公廬
夜夢神官授我書
夢中所見悉能記

生花吐鳳言非誣初行隨意遊郊墟惡犬攢嗥猛如羆
垂手拾塊苦無力峩峩東臯來丈夫丈夫儀容媿且都
指示芳徑行無虞芳徑春花鬪顏色茶蘼海棠交枝舒
重重樓閣階縈紆花露溼我紅瓊瑜其間陳設何所有
研屏筆格皆珊瑚牙籤疊架字不辨袖手彳亍空嗟吁
旁有一函六卷餘題箋標寫司空圖讀畢秋水沁心骨
分藏懷袖開襟裾無何金碧成模糊殘磬一聲山月孤
啼來清曉記年月甲戌上元交春初 是夜立春

代相馬篇

長城城西古馬邑萬方駉北如雲集中有羸驂八尺長
相者見馬爲馬泣自言曾從天廐來天廐之馬何雄哉
金勒搜嵌青翡翠銀鞍雕飾紅玫瑰玫瑰翡翠爲妝束
萬里春生騏驥足組絲爲繫插琅玕削木爲盤堆苜蓿
苜蓿能令瘦馬肥圍人四牡歌駉駉翰林待詔來金殿
虢國承恩入瑣闥瑋琯杯盛躑躅乳開元天寶教歌舞
不同舊例歸閒槽譜得新聲收樂府樂府齊歌君馬黃
君馬恐非臣馬良昨日相馬爲君喜今日相馬爲君傷
如何躡景追風騎鎮日邊城馳牧隸吞聲不作畏寒嘶

埋頭喪盡凌雲氣可憐蛟竹雙耳披可憐繁霜割四蹄
金鳳闕前花簇簇玉門關外草萋萋玉門關接金鳳闕
一樣驂騮判優劣從繩則直曲則鉤此情合向蒙莊說

小題襟館聽張伯冶騏洞簫武實父譽鳴琴

鴛鴦比翼鳳九苞竹聲清脆桐尾焦白雲不動春風驕
仙人鶴背相招邀初彈楚妃後六么嗚嗚律呂和雲璈
始知廣陵散未絕二十四橋舊明月松風拂水雁眠沙
鐵騎突出銀瓶裂我昔泛海復入秦高樓百尺扁舟輕
相逢赤壁崖前客入夢語我君山青波濤夜永戛冰雪

七條絃索聲泠泠古人古人爾勿矜蕭史成連今復生

爲友人題唐寅寫踏雪尋梅圖卷子

建康客廣州書攜圖索詩來吾廬展圖訝丹青却與常
圖殊始知作圖人乃是唐六如唐六如非庸手能使鬚
眉判童叟童折梅花壓背香蹇驢踏雪蒼山蒼感我昔
年遊襄陽高車大馬輝容光朱家郭解盡低首相逢遊
俠少年場燕姬弄楚舞潑酒污羅裳鹿門山月照漁梁
斯人斯人徒相望吾愛孟夫子清芬豈文章當時競權
貴此身能獨藏所以榮與辱不上君子堂

神鐙曲 并序

己卯試鐙後一日偕二三知己嶽廟觀鐙歸途
遙見廟之東北隅瑩瑩鐙光千百爲羣轉瞬間
然明日告諸同社或云此神鐙也合識之

太歲在卯月建寅金吾不禁客夜行紅樓錯雜箏琶笙
酒酣踏月來鄉村寒雲挂樹風無聲荒塚纍纍鼉鼉奔
東皇太乙故址存蝙蝠嘖嘖飛黃昏靈旗不動天如冰
湖波驟湧千百鐙迴環閃爍降復升臨流再琴書諸紳
舉頭尺五皆神明

曙原贈墨成篋書此覆之

黃山家家解製墨日掃元霜十萬斛春波翦碎隔江煙
松煤燒遍千山綠曙原先生好事者年年採墨黃山下
盈箱載得墨歸來古今法帖供揮灑年來我亦詩成癖
日日蠻牋寫胸臆曙原知我貧分我墨三升從此管城
子不作饑驅行石田雖云荒淋漓足可耕與酣作字大
如斗萬言琅琅隨筆走詩成明月來照我杯中酒揚雄
大文猶覆瓿何況吾曹馬如狗曙原曙原爾知否詩字
何須問妍醜晉君酒君勿辭感君落拓前致詞君今學

書三十載至今名姓無人知
澥內赫赫數十輩
幾人顏柳窺藩籬
不如盡棄盈箱墨
潛向東郊抱雲宿

叶

戊寅秋七月遊相墩作並序

相君直益其先德于漕河西北角購二十八墩
之一爲別墅顏之曰近湖草堂環墩置草田數
十頃歲收其租以供不時種花植木開池築亭
故文人名士往往遊其閒題咏甚夥今年秋直
益放楫招飲是日熱甚歸而識之

雷鞭亂擊屏翳死蓮葉舟輕菱葉紫
七尺枯篁釣淺深

千桑萬柳垂濃陰濃陰覆背衣不溼主人瓮抱蒼松汁
醉眼看天詔萬山各佈真形鬪顏色三十六湖波不興
二十八宿羅星文箕豹軫蚓精之靈呼龍吐沫凝輕冰
深宵繼燭忘主賓埽花露吸玻璃瓶

虞醫士五十壽徵詩同社分題得摩詰畫

晉人論畫嗤王維雪花鎔雜芭蕉肥我今作詩亦如此
杏花亂逐秋風飛秋風紅遍愚公谷十萬牙籌插澥屋
澥屋雙鶴銜籌來報我杏花千株開招我過湖酌春酒
我方醉不能詼諧草草作詩付鶴去隔湖遙琴千株樹

風光再閱五十年擬買鷲谿畫偈佗縱無筆力追摩詰
肯負人間百歲仙

陳孺人輓歌

並序

孺人余鄉奚竹谿先生母也先生尊人去鄉三
十年矣而孺人茹冰嚙蘗鄉里推之今年秋孺
人長逝徵詩與余余不敢辭聊拾數語以輓孺
人萬一云

怪鳥叫殘山底月孝子滴盡心頭血心頭血盡怪鳥飛
飛向長空婺星滅婺星小謫凡幾年年年鵲駕空雲煙

伯勞東飛失歸路新豐醉墮珊胡鞭別鶴新聲翻趙瑟
五十柔絲彈不出分得鄰鐙鬼眼青夜靜書聲雜刀尺
井波不起山凝暉九熊紅淚春溼衣少微瑩瑩板輿冷
白雲三匝當窗飛不知它日人民非可能雙鶴同來歸

李長吉詠月

團團一片玻璃紙中有蝦蟇古不死翻身飛上青冥天
萬里清光吸寒水清光當戶妾拋梭褰裳掠鬢窺明河
明河在天何皎皎明月照人人易老

無題

紅樓明月揚清燿，簾幃面面珍珠垂。相思望冷碧雲斷，
玉容未許輕相窺。青溪原屬舊居處，自嫁彭郎隔煙樹。
爲誰錦字紅鱗飛，爲誰菱葉青銅鑄。十年繡幄閒篔簹，
珠絲網遍珊瑚鉤。桐華雜雨溼金井，夢尋不到青澗頭。
長江之水長悠悠，不比長干兒女愁。絕代丰姿掩黃土，
姊歸啼血噴松楸。

澥棠歌

我疑蕊宮仙子唾紅絨，飛來澥棠枝上嬌。春風又疑廉
郊蕤賓調未洽，方響躍出化梗皆爲鐵。一絲兩絲千萬

絲絲絲臥對焉支雪綽約窗前鎖翠煙玲瓏檻外飾金
月神仙不畏夜寒侵沈香亭北睡初醒高張四角縣紅
鐙文章艷麗如繁星主人抱青琴上堂勸君酌當花不
飲花笑人容易階前歎飄泊花落花開本不常綺窗脈
脈愁紅粧

指書歌爲張鴻遠作

我聞張旭大醉時以頭濡墨書淋漓手捫足踏隨變化
蟠蛇屈蠖開天機堂元戶妙杳莫測後人無復窺藩籬
八分泥古不足貴古人太瘦今太肥草聖衣鉢傳者誰

臨川布衣張鴻達篋秘明珠三百顆不翦湘江竹一枝
家法盡埽舊窠臼指頭蘸墨煙雲飛隔紋無跡拇有勁
戈挑點畫勻參差松寒古澗潛虬媚雪戀窮簷冰柱垂
惠我長幅竊空壁天清雲淨無纖埃坐對久久忽大悟
知君投筆非徒爲丈夫從古貴破格安能拘拘守此三
寸之毛錐

偶成

黃花臥秋雨有淚不敢哭鳳凰被文章飲啄常不足鯉
魚借霧飛上天亂嚙桂花三十年真宰不奏少微怒竹

截蟾宮剝寒兔秋墳踢碎玉鉤斜喚醒香魂織紉素心
機血杵千尺長繪取峨岷山下路繪就擲龍宮為我報
龍子休將一點紅輕染鯉魚尾天際慶風雲茫茫隔煙
水鶴鳴九臯聲聞天天高聽卑豈無耳

送史牧田

謙

溟溟濛濛花舍煙欲雨不雨春可憐餞君杯酒湖之滄
聞君南游情如顛情如顛悲復喜喜見搏風九萬里結
席還悲暫別君別君以後誰論文惆悵此心託明月相
思不定如奔雲君不聞龍門太史有至語不遊萬里空

云云又不見先儒出蹟分明在成名多在家人外人生
天地胡不游時乎時乎不可再動我愁懷君所知十年
徒讀書與詩高堂有母厨無粟此身欲出長遲遲勸君
酌爲君歌讀書之處匡山阿綠波春水傷如何

許季青乃椿索題叢桂招隱圖

我生四十不得志轉悔詩書縛豪氣狂餘白眼望青天
累足江鄉戀文字三復考槃歌澗阿欲隱未隱傷如何
近得一編無盡意君集名無盡意齋朝披夕誦恒嗟磨丁卯詩
人才算敵峽倒詞源瀉寒碧蒼松修竹自嫵媚不向春

風僧顏色村醪獨撫東窗裏愁見江雲日暮起淞水淮
山路阻修相思盼斷雙紅鯉今春阮孚招同遊謂梅中
流鼓柂沙棠舟始得相逢話永夕踟躕執手情綢繆萍
漂蓬轉胡爲乎袖中示我招隱圖茅亭石磴秋香鋪藏
身匿跡無代無荷衣箬笠青珊瑚或山或林或朝市渺
渺天地皆蘧廬讀罷斯圖向君揖我欲圖中分一席被
此狂歌煙靄間埽苔題遍秋山石

憶月

六月晦日應無月顧兔藏形蟾影滅挑燈兀坐不成眠

案頭欲冷金鑪煙依稀記得月初時嫩人曾學畫蛾眉
山空水濶情無限玉露迢迢清風吹皓魄漸圓光漸霽
玉質盈盈映千里含芳之樹何青青銀漢無聲淨微滓
嗟乎嗟乎雙淚垂勸君一飲須百杯請看月缺月還滿
人似長江水不回

心朗和上出其師慶菴上人行脚圖屬題

茅菴煙鎖城西路舊是高僧栖隱處左右周回盡古墓
夜夜青燐飛上樹舍利光舍春復秋打包行脚任悠悠
慈雲欲建須彌塢蘆葦先浮江上舟此時刺罷心頭血

此時踏遍峨眉雪，心頭血寫法華經。峨眉雪映揚州月，揚州明月揚秋輝。萬里魂從江上歸，一指蓮花隨地起。衣鉢真傳得齊已。

謂心朗

墨卿太守

謂伊公秉綬

藥春來相逢

一笑大歡喜，爲師鳩工拓舊址。曲徑長廊相表裏，蒼松老作雙龍鱗。新竹亂排千鳳尾，往來公卿無時無。惟有禪心淨似水，吁嗟乎開創固難守。不易昔日茅葺今日寺，幽冥鐘聲六時發。古墓青燐盡超拔。

成簡能

塾

屬題桃花流水鱖魚肥小照

豈不聞成連琴千秋澗，上遺真音復不聞。成原常春風

一櫂湖波光君家世志在湖澥年年歲歲春長在我未
識君時君名我已知桃花韻君而柳汁染君衣鵬搏暫
斂垂天翼斥鷃何妨笑啞啞古來深於情者多不獨相
如詞賦客楚昭王晉重耳感流光悲逝水三年不鳴鳴
則驚霸業不礙傾城人而況吾曹事筆研報國文章
托鉛槧它日心從雲外飛斯時志向圖中見圖中春水
映朝日桃花紅遍江南色江南色何方多笠澤春回太
液波前代幽人張志和曾持長竹披青葢鱖魚肥嫩不
歸去笑脫朝簪此櫂住知君作圖良有由不同前哲輕

公侯一夕乘風破萬里扁舟直向蓬萊遊

示紫簣僕

紫簣紫簣爾旣虛心勁節空山中嗚嗚咽咽鳴春風曷
若盡去塵土之根爲我之筇伴我朝遊廣漠之野算愁
蒼梧之宮使三百六十萬日之後知吾道之不窮爾豈
不聞爾山之中有草如蘭現已登君子之堂人擬之爲
王者之香復不聞殿春小草厥名芍藥趨顏色掀帷
入幕使人見之易爲謔爾何爲者終日盈盈於野水之
側荒岡之間使余落日爲爾愁空山鳳皇卑不桡援猱

相躋攀白雲無聲萬籟死然後千巖萬壑波潏潏紫質
紫質勿謂天之生爾我之愴爾卽爲之奇渭川千畝猶
猗猗黃岡如椽孰不知之暝風吹楊花化作青萍子芝
生糞壤蓮污水斯言斯言吾語汝芍藥芝蘭當判取

王西成出行看子屬題

輕舟不繫揚州月
寒春偶泛崇川楫
蓮葉青浮水府錢
楊花白糝天街雪
五山秀色鍾紫琅
中有瑯琊大道王
相逢一笑若舊識
華堂鐙燭羅酒漿
裙屐湖山觀鶴舞
主人眞率空今古
似玉兒郎五桂枝
傳家祖德三槐樹

得祿圖成筆有神，鬚眉我識畫中身。昇平自有文華國，肯使湖山讓別人。

楊述臣茂才

廷讓

屬題倡酬詩冊卽用原韻

名山我已探八九，不若當前一杯酒。典酬搖筆驚風雷，星宿羅胸墨濡首。有時倚劍復長嘯，一任寒芒下高阜。功名蹭蹬骨相寒，那用金錢問休咎。半生回首恩澤多，遙對師門呼負負。去年避災東湖濱，往往孤舟泣嫠婦。江東斗米錢十千，編氓祇合吞聲受。初聞古澗拾橡栗，漸見荒村斷榆柳。安得廣廈千萬間，羞說男兒好身手。

卽今西陲方用兵恨不持戈靖羣醜年年奔走長安道
折腰枉自謀升斗霜欺雪壓鬢鬢船唇馬背身偃僂
也曾三上宰相書博得人呼兔園叟豈少明珠作嫁費
終慙齊大難爲偶古今黑白多混淆卑視崇岡尊培塿
解悟莊生秋水篇不願雄飛願雌守扁舟忽作崇川遊
飄花飛舞三春後千載相期筆怒發盈川東川皆畏友

兼謂少山

倡酬許讀韓孟詩聲自和平氣溫厚

題張傳山紀夢圖

圖中乘馬多牡丹

螻蟻穴古樹蝴蝶飄春花丈夫不得志金玉成泥沙張

侯作吏江淮來峰巒筆底煙雲開丹青金碧大小李黃

荃父子皆奇才

詞桂岩先生

我時執杯酒讌君湖之隈春湖

水碧秋月白倚欄同按涼州篴人生歡笑無从長我走
燕南君越北豫東小醜時跳梁羽書旁午關河隔豈不
懷君頻夢君夢君躍馬同驅賊我夢固如此君夢竟如
彼我夢動躁君應知君夢富貴復奚疑相逢且進千金
卮白雲蒼狗誰知之

招魂曲

塞上草枯天雨霜千馬萬馬嘶斜陽官軍昨過洮河北

無算沙場裹馬革，匈奴耗傳來復渡。瀘招魂少婦升屋呼，君不聞晉陽無數冬青樹。半是前朝葬魂處。

題盧春航

培廣

江洲春泛圖

江波浩浩江煙碧，隔江遙帶春山色。澗燕門前柳葉青，河豚市上蘆芽白。憶昔乘潮弄江水，桃花亂疊紅雲起。天末浮嵐望眼賒，餘霞散作千層綺。此景回思二十年，今日重逢圖畫裏。君家家世況無比，文章早闢初唐體。大歷聲名重十子，月蝕詩成泣神鬼。扁舟一葉浮煙波，市隱却異張志和。不爲蓴鱸爲鰕菜，寄身煙雨風波外。

何日從君鼓枻遊一杯吸盡雲霞態

畫松歌爲張夢餘作

噫吁戲李氏兩將軍薛氏一少保皆擬富平侯下筆都能好金碧樓臺供內府十二珠簾弄春曉暇則關弓走白狼燕頷猿臂軍中裝君今作畫追薛李天下雲山羅十指我來僧房暫櫛止見君作畫僧房裏五株松樹數拳石暗裏精靈泣神鬼謾謾風聲四壁聞畫馬無論曹將軍況君壯歲好身手避仇直踏燕山雲東走吳越北走澣老去知交幾人在當筵且盡金屈卮我將爲君前

致詞君不聞顧愷之滄洲滿壁徒爾爲又不聞王郎拔
劍斫地歌聲哀一生磊落空奇才愧我才非杜甫官非
拾遺萬間廣厦胡爲乎來哉

篆書歌爲程蘅衫基作

程邈篆法肇初始君其繼之爲賢裔源流直上五千載
仙心不受罡風吹下視李斯已非古六朝餘子何足數
賈島多情佛乃成媧皇有志天能補憶管相思不相見
濛濛八表空冰霰此日同傾北澣樽鬚髮共喜白未半
有酒須澆滿目愁落花片片垂楊柳君抱奇才自坦率

當筵無論公與侯君不聞鄧完白式如一生老作諸侯

客腰垂白髮千丈長脫手黃金便蕭瑟又不見城東叟

胡長庚黃山老屋歌烏有興酣作字大如斗牀頭往往無

樽酒君今到處有逢迎下筆一字千黃金公卿爭問不

絕口較之二子誰浮沈皖江山水甲天下況君能此開

庭榭前江後山山作屏八百株桑供春稼何日尋君十

日留扁舟散髮樂清秋珊瑚七尺同遨遊一竿點破江

心漚

登太白樓

太白樓乃在采石磯邊西江頭青山橫山各綿亘昔時
戰壘今蘆洲孫吳割據此邊境晉家東渡稱咽喉吾祖
昔守宣城土朝朝算算青山游五字澄江淨如練能使
太白光芒收太白西行偶過此扁舟擊楫浮中流不願
官封萬戶侯但願驚人好句垂千秋騎鯨捉月寓言耳
錦袍烏帽隨沙鷗餘霞散後日將夕我正登樓三太息
吾祖不生太白死終古茫茫此江水江水東流年復年
嫩人含笑桃花鮮浮雲不近江樓前醉叱王喬馭笑拍
洪崖肩玉簫金管昆吾絃高歌把酒呼謫仙何不同來

一醉江之邊

題劉笠生茂才敦元紀夢圖

人生天地無非夢夢却與人有輕重腹既能生了固松
口能不吐揚雄鳳知君此夢非尋常天教大筆成文章

楹帖高懸十四字松邊竹外開書堂

君夢中見楹帖云
草茸竹外新開墜

松老庭前
舊著書

讀書萬卷興未足要使雲山歸掌握昂然直

上趙化臺年年芳草天涯綠瘴雨蠻煙歸去來依人又

唱梁園曲

笠生從東
粵之中州

縱使蛾眉不妬人從來才大難爲

福我亦年來淪落身烏尾畢逋車脫輻杯酒時從趙土

澆文章每向秋風哭
今秋逢君秦淮頭
攜樽同上秦淮樓
秦淮竹外松邊路
可是君家夢遊處
夢遊之處無纖埃
瓊樓玉宇金銀臺
天風誅宕天門開
蒼虬赤鳳雲中來
與君執手同徘徊
會須一飲三百杯
覆隍蕉鹿何爲哉
吁嗟乎覆隍蕉鹿何爲哉

題吳晉堃上舍梅花書屋圖

寒風吹香遍山谷
十二萬春春滿屋
中有幽人此寄居
龍眠山色環其廬
左圖右史蚪斗書
晉堃工篆隸 李斯程邈
分精麤下視鍾王已
非古手種梅花作花主
年未三十

筆如堵造門求書不可數其時我作羅浮遊匡廬九疑
隨扁舟思公子分情綢繆嫩人不來心煩憂那得如君
此邱壑波能濯硯香能嚼更寫斯圖當臥遊高枝不許
凡禽啄我欲與君同此樂回身翻笑蠶絲縛題詩聊紀
春風約平山雪後梅舒萼寄君一隻揚州鶴

晉參復出楊龍友書畫冊屬題

畫有六法書八法繩以律不容豪髮心正筆正精神通
皴雜披麻戈折鐵古人工畫不工書鄭虔始得稱三絕
後之繼者董與楊能書能畫能文章生值有明丁未造

不使文瀾頹紀綱宗伯書畫有時見嫵媚秀骨天開張
中丞書畫世所寶片紙隻字人珍藏延陵公子龍眠客
家多歷代名人冊中有中丞眞墨跡許我臥讀日復日
山川萬里收咫尺柳骨顏筋同一轍嗚乎丈夫作事無
巨細不以雕蟲爲小技至今紙上英風生遙想當年用
兵際金山用兵師斬王棘門壩上皆兒戲越水吳山凡
幾年龍眠歸葬舊精魂公貴州人
葬於桐城君不聞吾鄉閣部衣
冠葬猶有梅花繞墓門

江行紀事

吁嗟乎作客原無一定理誰道扁舟快如駛八日江行
八十里愁煞濡須江上水是時天寒多北風雪光如刀
入骨髓浪偏乘勢來船艙冰稜亂灑聲瑤瑤舟人護箴
復守舵那問客腹鳴饑腸眼花落水手足僵不思作客
思還鄉荒村夜泊眠不得四更片片霜花白風向南吹
忽北吹千里江陵還一日無數峯巒雪後看不願還鄉
願作客吁嗟乎人生苦樂休疑猜人生難得苦中來層
層佳境心顏開順風收舵傾樽罍君不見來船中有貴
公子好風順境不知止夜來竟在水中心

澗上遊仙詩

徒聞澗上三神山，山在虛無縹緲間。此山可望不可卽，
中有仙人蒼玉顏。仙之人兮太光怪，一見容顏不可再。
嗚乎回思我却非，仙才燕昭尚有黃金臺。

山旣不可登，澗亦不須渡。中流十丈寒濤飛，成連不見
吾何依。萬竿修竹森森碧，云是仙人舊時蹟。嗚乎結習
未除，丹未成，那得清名挂仙籍。

方士一言曷足取，五百童男并童女。自今澗上求仙人，
猶自翩翩弄霞舉。青鳥不來芝不生，黃沙漠漠揚飛塵。

嗚乎羿妻奔走夸父渴上帝深宮閉閭闔

王母西來有深意赤文綠章先我示滄桑有劫終循還
未必神仙皆識字西走玉兔東走烏白慚我本耕田夫
嗚乎流光一擲不可返茫茫天道那能挽漢帝秦皇徒
坎坎

留別盛子履學博

大士

我從客歲遊雲間扁舟來往橫雲山雪花如掌朔風冷
淒其凋我蒼容顏澗中明月那可捉袖裏詩篇供寂寞

雲間詩人欽吉堂

善

示我一編蘊懔閣

君集

名蘊懔閣真

仙才三復而後心顏開瓊漿玉液珍珠胎今年我向長
淮來相逢同上韓侯臺珊瑚筆架鸚鵡杯玉兔不走金
烏催風伯似多情雨師亦關數留我長淮三日住日向
先生讀書處落花滿徑鶯啼樹來朝又放扁舟去

四月十五日渡黃河作

昨日我向桃源去黃河洪澤夾沙路今日我從衆興回
黃河運河環堤堆運河有風波不與黃河無風聲奔騰
黃河運河紐十字清黃雨壩前賢置其時四月多南風
漕船兩岸排鱗次兩岸旌旗耀水濱高唱皇華 天使

至嗚乎我聞黃河之水天上來當堯之時猶成災漢武
開邊拓地數萬里宣房瓠子歌聲起況復方今 聖人
在上黃河清諸公曷不歌昇平

抵質慶陪譚鐵簫太守

光祜

卽夕以英雄兒女

圖屬題

無深情莫論兒女無俠骨莫言英雄胡牀竟夕發清嘯
大樹獨立羞戰功武岡山畔讀圖畫寒光直透薰風中
壯士長歌鐵衣冷嫩人含淚冰壺紅噫吁嚱殺賊功名
視草草黃梁未熟天還早僭取緱山簫一枝鶴背聲蜚

山月小

李泚颿觀察

宗傳

屬題釣鰲圖卷子

沫珠噴灑鱗揚鬣萬丈長虹蝕秋月
龍門啟後謫仙來
雲璈水瑟滄溟開釣鰲我亦生平志
鎮日臨流鉤不利
悟破先生圖畫情一竿坐待神山至

秋日見牡丹一枝

其地荒僻無人居其花不偕春風噓山腰
牛羊日踐踏
入夏枝葉稍稍舒獨挺一幹豔蓓蕾開時
還勝紅芙渠
雕玉不讓舞女珮天香夜襲仙人裾
聞好事者議移植

金盃玉盞供 天際近天雨露應更好故園芍藥今何
如

揚州鶴

揚州鶴毛羽離離頂不紅何所依隋帝宮宮中使者天
上來日以二升穀參爾靈禽胎使者參鶴春復春鶴梁
不足鶴能馴遂使腰纏十萬者雲中之鶴不敢下君不
聞葉公龍與塞翁馬

望羅浮吟一篇示湘姬

溼雲垂天雨如注咫尺羅浮不能去一筇一屐皆因緣

皓首煙江詎非數噫吁今東登秦岱南衡岳手摘星辰
倚高閣有時臥讀秦漢碑一任封蛇藏大壑何事羅浮
今夕梅千樹嫩人不見空延竚安得身騎白鳳凰直入
朱明最深處把酒高呼葛稚川同邀明月擘啓彤丹砂
莫向世人道世人但解名利好昨日之日不再來如花
顏色成枯荑賸取杯中酒酌爾五色蜨寄語翠首臺前
月莫向江南照離別江南思婦腸百結應灑樓頭眼中
血來時楊柳未成春此日關河幾番雪噫吁戲羅浮畢
竟誰爲主師雄一夢傳千古我願今宵好夢成不夢嫩

人夢鄉土

鄰船有以篷背雨聲詞見視使雛僕歌之其聲
清越遂教其體成四首

篷背雨聲聲不止何處饑聲啼不已鱗鱗萬瓦無饜烟
隔江猶自波濤起吁嗟乎萬金之子千金裝盧家小婦
稱孤孀昨日人來北邙道風蕭蕭兮墓頭草

篷背雨聲斷復續千聲萬聲鬼夜哭文字因緣事有無
上天幾見天雨粟吁嗟乎來日之日日苦短此身多病
無秦緩滿髻關河白髮生夢回天地車輪轉

篷背雨聲聲漸稀
雉朝飛兮妃呼豨
相如有賦不敢賣
溫家女兒空憐愛
鳩鳥聲喧萬壑哀
玉如意擊珊瑚碎
吁嗟乎裴航莫辨
藍橋路北斗橫天
天欲曙

篷背雨聲聲已絕
冰心釀出藍闕雪
誰信朝霞散赤城
半是離人眼中血
吁嗟乎老拳毒手
事非常何物書生
古道旁請君爲我
歌藥轉輓轡
綆汲銀瓶軟

苦雨

去年二月二日雪
手足凍皴皮穴裂
至十八日半月餘
天昏地慘人愁絕
今年二月多雨風
樹樹桃花無笑容

星河汨沒顧兔死宵冥晝晦如洪濛有時霑霑屋宇壞
有時拔木風力大拔木壞屋猶等閒蠶僵麥爛爲農害
君不記去年雖雪未全荒苛吏索租如虎狼大婦典釵
沽酒漿小婦洗手爲羹湯羹湯供吏吏不飽猶罵農家
何草草

太白樓

在濟寧州

十月已朔風驅車將南歸任城逆旅一停轍蘆花吹雪
沾人衣當罍女兒年十五留客慣使雙眉語阮籍猖狂
罍畔眠醉時同上城南顛酒樓遺址空荒煙俯視南池

頗寂寞絕代風流殊堪憐嗚乎前年我從采石磯邊遊
天風吹上磯邊樓碑版輝皇照四壁畫圖一氣凌滄洲
同一謫仙樓同一謫仙人相去一千五百里迥然光景
雲泥分嗚乎須知南風豔麗北蕭瑟何況浮雲與遷客
斷雁孤鴻未有涯數聲杳杳極寒碧

李玉郎歌 並序

李玉郎者安徽懷寧人也以色藝隨桐城方君
之任山左余耳玉郎名久矣今年秋來依上公
玉郎先在府第蓋方君與伯澥儲公秦晉也時

遣侍之余得瞻其容色雖不及府第諸伶然近
日亦罕見者不無歎賞儲公命賦長句並紀其
顛末云

江南江北櫻桃花含風向曉枝枝斜地近龍眠山色好
勻圓萬顆紅兒家兒家舊住龍眠側青螺遙映雲鬢溼
長成聲價重梨園我管相思未相識龍眠公子繡衣郎
二十專城宰壽張攜將麴部龜年齋來贈琅玕大道王
上公府第今梁園魯國諸生半在門揚雄奇字朝題策
張泌新詞夜倚聲揚雄張泌才無匹埜也叨爲座上客

幾番公讌許追陪不賦長楊賦長筵長筵一聲萬花舞
玉郎笑擲珊瑚樹舞罷渾疑花片飛歌停恍似鶯聲住
絳燭千條徹夜燒珍珠亂灑紫檀槽停歌罷舞邀相見
果然玉立丰姿豔垂手參差玉珮鳴步搖鎔雜金釵顫
金釵玉珮好腰肢楊柳風迴太液池屈伸玉指擎杯際
灑灑星眸欲醉時此時萬楚心將死此時杜牧狂難已
能令相如癆疾消一杯除是天河水君不聞辟疆園雲
耶姣好顏如仙有客有客陳其年梅花一夜詩百篇又
不聞小倉山狀元夫人李桂官一生知遇畢宮保跋涉

追隨萬里道卽今若輩豈無人愧我才非畢與陳擬將
宋玉高唐賦寫贈雲英掌上身

金約指歌爲瑞喜兒作瑞喜兒者沂州人隋假
母作琵琶伎也寄居曲阜與江西某有終身之
約假母不許遂吞所贈金約指幾死賴救之速
余悲其志乃作是歌

珠光媚水金披沙瑯琊女兒嬌如花十三十四教歌舞
枇杷一樹當門遮當門月色不常好琴心怕逐風塵老
偶寄仙源作小留遊才待把修蛾掃玉指春藏翠袖纖

金蓮霜印苔痕小
欵欵香車陌上歸
梨花雨後掩雙扉
低眉記把紅牙按
愛唱當筵金縷衣
聲價千金不輕許
夜夜空房淚如雨
楊花歷亂柳花飛
飄茵落溷誰爲主
幾番團扇強徘徊
蠶蛻殷勤訪豔來
相逢乍接燈前笑
把臂連傾月下杯
燈前月下兩相洽
情緣挽就同心結
便把黃金約指留
安排打槩迎桃葉
從此紅燈夜夜燒
芙蓉帳底可憐宵
拚教壓損金條脫
那管釵橫翡翠翹
深宵嚙臂盟非淺
不化鴛鴦恨不消
離聲忽唱西飛燕
紅豆緘封怕郎見
珍重秋來七夕期
重逢莫負雙星願

鴉鳥無端慣作媒
雲容頓逐朝霞變
一紙空函託僞書
阿母佯瞋索繡襦
石闕銜碑嬌不語
藥店飛龍事有無
誰知此際愁無伴
誰知此夜柔懷亂
約指難忘昨夜恩
情根擬向今宵斷
咽恨吞愁漏轉遲
續命全憑五色絲
我時亦在仙源住
對影聞聲繫所思

李生玉郎梨園中善舞者也嘗扮花木蘭洗國
夫人諸劇窈窕中有一種英爽之氣世不多見
余曾作歌紀之未幾棄所習習浮屠術聞而慙
之仍系之以詩

卷一百一十五
維摩斗室飛天花一花飛落江之涯江涯萬戶春無主
不願生男願生女生男慣作女兒妝送入梨園教歌舞
憶昔豐臺贈芍婦公讌追隨上公府回思解內優伶多
玉郎嫵媚誰堪伍皓齒明眸滿月龐軍中裝束更無雙
柳腰不讓秦良玉蓮步還勝雲暉孃衆中識得王之渙
新聲愛唱黃河傳不索纏頭索贈詩此中滋味腸堪斷
盛筵難再古今同春月秋花幾番換浮雲西北自高樓
溝水東南愁復愁舟中翠被香初散天上霓裳月不流
燕雲吳樹思何益過河賸有枯魚泣纔聞人澠唱楊枝

忽送春風皈淨域淨域諸天大歡喜愛河流斷相思水
蓮出淤泥本不污旃檀座上香生几一笑來參最上藥
三生石上證前因虎谿它日重相見添個高僧傳裏人